

四庫全書

集部

欽定四庫全書

石倉歷代詩選卷十

明 曹學佺 編

陳詩

後主

諱叔寶字元秀宣帝子

採桑

春樓髻梳罷南陌競相隨
去後花叢散風來香處移
廣袖承朝日長鬟礙聚枝
柯新攀易斷葉嫩摘前萎
採繁

鈎手弱微汗雜妝垂不應歸獨早堪為使君知

采蓮曲

相催暗中起妝前日已光隨宜巧注口薄落點花黃風
住疑衫密船小畏裾長波文散動櫂菱花拂度航低荷
亂翠影采袖新蓮香歸時會被喚且試入蘭房

昭君怨

圖形漢宮裏遙聘單于庭狼山聚雲暗龍沙飛雪輕笳
吟度隴咽笛轉出關鳴啼妝寒葉下愁眉塞月生只餘

馬上曲猶作別時聲

有所思

蕩子好蘭期，留人獨自思。
落花同淚臉，初月似愁眉。
階前看草蔓，窗中對網絲。
不言千里別，復是三春時。

佳人在北燕，相望渭橋邊。
團團落日樹，耿耿曙河天。
愁多明月下，淚盡雁行前。
別心不可寄，惟餘琴上絃。

隴頭水二首

塞外飛蓬征隴頭，流水鳴漠處。
揚沙暗波中，燥葉輕地。

迴冰易厚寒深溜轉清登山一回顧幽咽動邊情
高隴多悲風寒聲起夜叢禽飛暗識路鳥轉逐征蓬落
葉時驚沫移沙屢擁空回頭不見望流水玉門東

折楊柳

楊柳動春情倡園妾屢驚入樓含粉色依風雜管聲武
昌識新種官渡有殘生還將出塞曲仍共胡笳鳴

關山月

秋月上中天迴照關城前暈缺隨灰滅光滿應珠圓帶

樹還添桂銜峰乍似弦復教征戍客長怨久連翩

洛陽道

誼譁照邑里遨遊出洛京
霜枝嫩柳發水塹薄苔生
停鞭回去影駐軸敞前甍
臺上經相識城下屢逢迎
踟躕還借問只重未知名

日光朝杲杲照曜東京道
霧帶城樓開啼侵曙色早
佳麗嬌南陌香氣含風好
自憐釵上纓不歎河邊草

百尺瞰金埒九衢通玉堂
柳花塵裏暗槐色露中光
游

俠幽并客當壚京兆妝向夕風烟晚金羈滿洛陽

梅花落

春砌落芳梅飄零上鳳臺拂妝疑粉散逐溜似萍開映
日花光動迎風香氣來佳人早插髻試立且徘徊

楊叛兒曲

青春上陽月結伴戲京華龍媒玉珂馬鳳軫繡香車水
映臨橋樹風吹夾路花日昏歡宴罷相將歸狹斜

自君之出矣

自君之出矣霜暉當夜明思君若風影來去不曾停
自君之出矣房空帷帳輕思君如晝燭懷心不見明
自君之出矣不分道無情思君若寒草零落故心生

東飛伯勞歌

池側鴛鴦春日鶯綠枝絳樹相逢迎誰家住麗過淇上
翠釵綺袖波中漾雕軒繡戶花恒發珠簾玉砌移明月
年時二七猶未笄轉顧流盼鬢髻低風飛藥落將何故
可惜可憐空擲度

長相思

長相思久相憶關山征戍何時極望風雲絕音息上林
書不歸迴文徒自織羞將別後面還似初相識

同江僕射遊攝山棲霞寺

時宰礪溪心非關狎竹林驚鳥嶽青松繞雞峰白日沈天
迴浮雲細山空明月深摧殘枯樹影零落古藤陰霜村
夜鳥去風路寒猿吟自悲堪出俗詎是欲抽簪

立春日泛舟玄圃各賦一字六韻成篇

座有張式陸瓊顧野王謝仲緒
珣王襍傳綽陸瑜姚察等九人

春光反禁苑暖日暖源桃霄烟近漠漠暗浪遠滔滔石
苔侵綠蘚岼草發青袍迴歌逐轉櫟浮冰隨度刀遙看
柳色嫩迴望鳥飛高自得欣為樂忘意若臨濠

獻歲立春光風具美汎舟玄圃各賦六韻

座有張式陸瓊顧野王殷
謀陸珣岑之敬等六人

寒輕條已翠春初未轉禽野雪明巖曲山花照迴林苔
色隨冰溜樹影帶風沈沙長見水落歌遙覺浦深餘暉

斜四戶流風颭八音既此留連席遂欣放曠心

上巳宴麗暉殿各賦一字十韻

芳景滿闢窗暄光生遠阜更以登臨趣還勝被禊酒日
照原上桃風搖城外柳斷雲仍合霧輕霞時映牖遠樹
帶山高嬌鶯含響偶一峰遙落日數花飛映綬度鳥或遛
檐飄絲屢薄藪言志遽為樂置觴方薦壽文學且遯
羅綺令陳後干戈幸勿用寧須勞馬首

被禊汎舟春日玄圃各賦七韻

園林多趣賞被禊樂還尋春池已渺漫高枝自挺森日
裏絲光動水中花色沈安流淺易榜峭壁迴難臨野鶯
添管響深岫接鏡音山遠風烟麗苔輕激浪侵置酒來
英雅嘉賢良所欽

上已成篇

座有張式陸瓊顧野王
陸琢岑之敬等五人

園開簪帶合亭迴春芳過鶯度遊絲斷風駛落花多峰
幽來鳥嘯洲橫擁浪波歌聲初出牖舞影乍侵柯面玉

同釵玉衣羅異草蘿既悅弦筒暢復歡文酒和

七夕宴樂修殿各賦六韻

座有張式陸瓊褚玠王瓊
傅緯陸瑜姚察等七人

秋初芰荷殿寶帳芙蓉開玉笛隨弦上金鈿逐照迴釵
光搖玳瑁柱色輕玫瑰笑靨人前斂衣香動處來非同
七襄駕詎隔一春梅神仙定不及寧用流霞杯

五言畫堂良夜履長在節歌管賦詩迺筵命酒

十韻成篇

季冬初陽始寒氣尚蕭颯原葉或委低岫雲時吐欲雕
樹乍疎迴遠峰自重沓雲興四山靈風動萬籟答肅肅凝
霜下戔戔層冰合複殿可以娛於茲多延納迢迢百尺
觀杳杳三休閣前後訓導屏左右文衛西進退簪纓移
縱橫壯思雜幸矣天地泰當無范睢拉

同管記陸瑜七夕四韻

陸瑜王瓊
等二人和

河漢言清淺相望限烟霄雲生劒氣沒槎還客宿遙月
上仍為鏡星連可作橋惟當有今夕一夜不迢迢

晚宴文思殿

晚日落餘暉
宵園翠蓋飛
荷影侵池浪
雲色入山扉
螢光息復起
暗鳥去翻歸
樂極未言醉
杯深猶恨稀

三善殿夕望山燈

重岫多風烟
華燈此岫邊
涸浦如珠露
雕樹似花鈿
依樓雜度月
帶石影開蓮
既然常滿照
羞與曉星連

小窗詩

午醉醒來晚
無人夢自驚
夕陽如有意
偏傍小窗明

寄碧玉詩

離別腸應斷相思骨合銷
愁魂若飛散憑杖一相招

陰鏗

字子堅
武威人

新成安樂宮

新宮實壯哉雲裏望樓臺
迢遞翔鵬仰連翩賀燕來
重欄寒霧宿丹井夏蓮開
砌石披新錦梁花畫早梅
欲知安樂盛歌管雜塵埃

班婕妤怨

栢梁新寵盛長信昔恩傾誰謂詩書巧翻為歌舞輕花
月分窗進苔草共堦生接淚衫前滿單眠夢裏驚可惜
逢秋扇何用合歡名

蜀道難

王尊奉漢朝靈關不憚遙高岷長有雪陰棧屢經燒輪
摧九折路騎阻七星橋蜀道難如此功名詎可要

和登百花亭懷荆楚

江陵一柱觀潯陽千里潮風烟望似接川路恨成遙落

花輕未下飛絲斷易飄藤長還依格荷生不避橋陽臺
可憶處惟有暮將朝

廣陵峴送北使

行人引去節送客艤歸艫即是觀濤處仍為郊贈衢汀
洲浪已息邦江路不紆亭嘶背櫪馬檣轉向風烏海上
春雲雜天際晚帆孤離舟對零雨別渚望飛鳧定知能
下淚非但一楊朱

江津送劉光祿不及

依然臨送渚長望倚河津鼓聲隨聽絕帆勢與雲隣泊
處空餘鳥離亭已散人林寒正下葉釣晚欲收綸如何
相背遠江漠與城闔

和傅郎歲暮還湘州

蒼茫歲欲晚辛苦客方行大江靜猶浪扁舟獨且征棠
枯絳葉盡蘆凍白花輕戍人寒不望沙禽迴未驚湘波
各深淺空軫念歸情

渡青草湖

洞庭春溜滿平湖錦帆張沅水桃花色湘流杜若香穴
去茅山近江連巫峽長帶天澄迴碧映日動浮光行舟
逗遠樹度鳥息危檣滔滔不可測一葦詎能航

遊始興道館

紫臺高不極清溪千仞餘壇邊逢藥鉞洞裏閱仙書庭
舞經乘鶴池游被控魚稍昏蕙葉斂欲暝槿花疎徒教
斧柯爛會自不凌虛

開善寺

驚嶺春光徧王城野望通登臨情不極蕭散趣無窮鶯
隨入戶樹花逐下山風棟裏歸雲白窗外落暉紅古石
何年卧枯樹幾春空淹留昔未及幽桂在芳叢

晚出新亭

大江一浩蕩離悲足幾重潮落猶如蓋雲昏不作峰遠
戍惟聞鼓寒山但見松九十方稱半歸途詎有蹤

晚泊五洲

客行逢日暮結纜晚洲中戍樓因嵒險村路入江窮水

隨雲度黑山帶日歸紅遙憐一柱觀欲輕千里風

雪裏梅花

春近寒雖轉梅舒雪尚飄從風還共落照日不俱消葉
開隨足影花多助重條今來漸異昨向晚判勝朝

徐陵

字孝穆東海鄭人

出自薊北門行

薊北聊長望黃昏心獨愁燕山對古剎代郡隱城樓屢
戰橋恒斷長冰塹不流天雲如地陣漢月帶胡秋積土

泥函谷接繩縛涼州平生燕領相會自得封侯

折楊柳

嫋嫋河堤樹依依魏主營江陵有舊曲洛下作新聲妾
對長楊苑君登高柳城春還應共見蕩子太無情

關山月

月出柳城東微雲掩復通蒼茫縈白暈蕭瑟帶長風羌
兵燒上郡胡騎獵雲中將軍擁節起戰士夜鳴弓

洛陽道二首

綠柳三春暗紅塵百戲多東門向金馬南陌接銅駝華
軒翼葆吹飛蓋響鳴珂潘郎車欲滿無奈擲花何
洛陽馳道上春日起塵埃濯龍望如霧河橋渡似雷聞
珂知馬蹀傍幃見覺開相看不得語密意眼中來

梅花落

對戶一株梅新花落故栽燕拾還蓮井風吹上鏡臺娼
家怨思妾樓上獨徘徊啼看竹葉錦簷罷未能栽

長相思二首

長相思望歸難傳聞奉詔使臯蘭龍城遠雁門寒愁來
瘦轉劇衣帶自然寬念君今不見誰為抱腰看

長相思好春節夢裏恒啼悲不洩帳中起窗前髻柳絮
飛還聚遊絲斷復結欲見洛陽花如君隴頭雪

春情

風光今日動雪色故年殘薄夜迎新節當壚却晚寒奇
香分細霧石炭擣輕紈竹葉裁衣帶梅花奠酒盤年芳
袖裏出春色黛中安欲知迷下蔡先將過上蘭

山齋

桃源驚往客，鶴嶠斷來賓。
復有風雲處，蕭條無俗人。
山寒微有雪，石路本無塵。
竹徑蒙籠巧，茅齋結構新。
燒香披道記，懸鏡厭山神。
砌水何年溜，簷桐幾度春。
雲霞一已絕，寧辨漢將秦。

奉和山池

羅浮無定所，鬱島屢遷移。
不覺因風雨，何時入後池。
樓臺非一勢，臨翫自多奇。
雲生對戶石，猿挂入欄枝。

爲羊兗州家人答餉鏡

信來贈寶鏡
亭亭似團月
鏡久自踰明
人久情愈歇
取鏡挂空臺
於今莫復開
不見孤鸞鳥
香魂何處來

春日

岼烟起暮色
岼水帶斜暉
逕狹橫枝度
簾搖驚燕飛
落花承步履
流澗寫行衣
何殊九枝蓋
薄暮洞庭歸

徐孝克

陵之弟

仰同令君攝山棲霞寺山房夜坐六韻

戒壇青石路靈相紫金峰影盡皈依鵲餐迎守護龍晨
朝宣寶偈寒夜斂疎鐘芝蘭靜舍握仁智獨從容五禪
清慮表七覺蕩心封願言于此處攜手屢相逢

沈炯

字初明吳興武
康人約之後

從遊天中寺應令

福界新開草名僧共下筵楊枝生拱樹錫杖呪飛泉石
座應朝講山龕擬夜禪當非舍衛國賣地取金錢

名都一何綺

名都一何綺春日吐光輝高樓雲母扇複殿瑠璃扉昭
儀同輦出高安連騎歸欲知天子貴千門應紫微

周弘正

字思行汝南安成人

還草堂尋處士弟

四時易荏苒百齡倏將半故老多零落山僧盡雕散宿
樹倒為查舊水侵成岼幽尋屬令弟依然歸舊館感物
自多傷况乃春鶯亂

和庾肩吾入道館

石梁有舊路靈室儼衆仙
菊潭溜餘水丹竈起殘煙
桃花經作實海水屢成田
逆愁歸舊里追問斧柯年

陸瑜

字幹玉
吳郡人

東飛伯勞歌

西王青鳥秦女鸞
姮娥婺女慣相看
誰家玉顏窺上路
粉色衣香雜風度
九重樓檻芙蓉華
四隣照鏡菱菱花
新妝年幾纔三五
隱幔藏羞臨網戶
然香氣歇不飛烟
空留可憐年一年

張正見

字見贖清河東武城人

度關山

關山度曉月，劍客遠從征。
雲中出迴陣，天外落奇兵。
輪摧偃去節，樹倒礙懸旌。
沙場折坂暗，雲積榆溪明。
馬倦時銜草，人疲屢看城。
寒隴胡笳澀，空林漢鼓鳴。
還聽嗚咽水，併切斷腸聲。

採桑

春樓曙鳥驚，驚蟄妾候初晴。
迎風金珥落，向日玉釵明。
徙

顧移籠影攀鉤動釧聲葉高知手弱枝軟覺身輕人多
羞借問年少怯逢迎恐疑夫壻遠聊復答專城

艷歌行

城隅上朝日斜暉照杏梁併捲茱萸帳爭移翡翠牀
紫環聊向牖拂鏡且調妝裁金作小靨借麝起微黃
二八秦樓婦三十侍中郎執戟超丹陛豐貂入建章
未安文史閣獨結少年場彎弧貫葉影學劍動星芒
翠蓋飛城曲金鞍橫道傍調鷹向新市彈雀往睢陽
行行稍有極

暮暮歸蘭房前瞻富羅綺左顧足鴛鴦蓮舒千葉氣燈
吐百枝光滿酌胡姬酒多燒荀令香不學幽閨妾生離
怨采桑

從軍行

胡兵屯薊北漢將起山西故人輕百戰聊欲定三齊風
前噴畫角雲上舞飛梯雁塞秋聲遠龍沙雲路迷燕然
自可勒函谷詎須泥

門有車馬客行

飛觀霞光啟重門
平旦開北闕高箱過
東方連騎來紅塵
揚翠轂赭汗染龍媒
桃花夾逕聚流水
傍池回投鞭聊靜電
捐軫暫停雷
非關萬里客自有六奇才
琴和朝雉操酒泛夜光杯
舞袖飄金谷歌聲遶鳳臺
良時不可再騶馭鬱相催
安知太行道失路車輪摧

怨詩

新豐妖冶地遊俠競嬌奢
池臺間羅綺桃李雜煙霞
蓋影分連騎衣香合並車
艷粉驚飛蝶紅妝映落花
舞衫

飄冶袖歌扇掩團紗玉牀珠帳卷金樓鏡月斜還疑蕭
史鳳不及李倫家

輕薄篇

洛陽美年少朝日正開霞細蹠連錢馬傍趨首着花揚
鞭還却望春色滿東家井桃映水落門柳雜風斜綿蠻
弄清綺蛺蝶遶承華欲往飛廉館遙駐季倫車石榴傳
瑪瑙蘭有真象牙聊持自娛樂未是鬪豪奢莫嫌龍馭
晚扶桑復浴鵝

折楊柳

楊柳半垂空裊裊上春中枝疎董澤箭葉碎楚臣弓色
映長河水花飛高樹風莫言限宮掖不閉長楊宮

關山月

巖間度月華流彩映山斜暈逐連城壁輪隨出塞車唐
冀遙合影秦桂遠分花欲驗盈虛理方知道路賒

從永陽王遊虎丘山

滄波壯鬱島洛邑鎮崇芒未若茲山麗宕蕘擅水鄉地

靈侔少室塗艱像太行重巖標虎據九曲峻羊腸溜深
澗無底風幽谷自涼寶沈餘玉氣劒隱絕星光白雲多
異影丹桂有葉香遠看銀臺竦洞塔耀山莊瑞草生金
地天花照石梁

與錢玄智汎舟

高門事休沐朝野恣逢迎還乘金谷水俱望洛陽城舟
移津女渡楫動渭橋橫風高雁已落雨霽水還清葉盡
桐門淨花秋菊岫明欲奏江南曲聊習棹歌行

遊匡山簡寂館

三梁礪本絕千仞路猶通
即此神山內銀榜映仙宮
鏡似臨峰月流如飲澗
虹幽桂無斜影深松有勁風
惟當遠人望知在白雲中

山家閨怨

王孫春好遊雲鬢不勝愁
離鴻暫罷曲別路已經秋
山中桂花晚勿爲俗人留

傷韋侍讀

懷經傳北海蘊義盛西河高峰落迴照逝水沒驚波柳
下悲風急山陽秋氣多宿草推書帶寒松脫女蘿無復
華陰市空餘蒿里歌

後湖汎舟

上苑奢行樂滄池聊薄遊汎荷分蘭櫂沈槎觸桂舟殘
虹收度雨缺岼上新流欲知有高趣長楊送麥秋

行經季子廟

延州高讓遠傳芳世祀移地絕遺金路松悲懸劒枝野

藤侵沸井山雨濕苔碑別有觀風處樂奏無人知

詠雪應衡陽王教

九冬飄遠雪六出表豐年睢陽生玉樹雲夢起瓊田入
窗輕落粉拂柳駛飛綿欲動淮南賦亂下桂花前

賦得雪映夜舟

黃雲迷鳥路白雪下鳬舟分沙映冰浦照鶴聚寒流檣
風吹影落纜錦雜花浮舩梁若是桂翻如月照秋

浦狹村烟度

茅蘭夾兩岼野燎燭中川村長合夜影水狹度浮烟收
光暗鳥弋分火照漁船山人不吹桂樵華幸共然

秋日別庾正員

征途愁轉旆連騎慘停鑣朔氣凌疎木江風送上潮青
雀離帆遠朱鷺別路遙惟有當秋月夜夜上河橋

賦得佳期竟不歸

良人萬里向河源娼婦三秋思柳園路遠寄詩空織錦
宵長夢返欲驚魂飛蛾屢遶帷前燭衰草還侵階上玉

銜啼拂鏡不成粧，促柱繁絃還亂曲。
時分年移竟不歸，偏憎寒急夜縫衣。
流螢映月明空帳，疎葉從風入斷機。
自對孤鸞向影絕，終無一雁帶書回。

江總

字總持，濟陽考城人。

隴頭水二首

隴頭萬里外，天涯四面絕。
人將蓬共轉，水與啼俱咽。
驚湍自湧沸，古樹多摧折。
傳聞博望侯，辛苦提漢節。

霧暗山中日，風驚隴上秋。
徒傷幽咽響，不見東西流。
無

期從此別更度幾年幽遙聞玉關道望入杳悠悠

置酒高殿上

三清傳旨酒栢梁奉歡宴霜雲動玉葉凍水疎金箭羽
簫響鐘石流泉灌金殿盛時不再得光景馳如電

烏棲曲

桃花春水木蘭橈金羈翠蓋聚河橋隴西上計應行去
城南美人啼著曙

芳樹

朝霞映日殊未妍
珊瑚照水定非鮮
千葉芙蓉詎相似
百枝燈花復羞然
暫欲寄根對滄海
大願移華側
綺錢井上桃蟲誰可雜
庭中桂蠹豈見憐

東飛伯勞歌

南飛烏鵲北飛鴻
弄玉蘭香時會同
誰家可憐出窗牖
春心百媚勝楊柳
銀牀金屋勝流蘇
寶鏡玉釵橫珊瑚
時年二八新紅臉
宜笑宜歌羞更斂
風花一去杳不歸
祇爲無雙惜舞衣

雜曲三首

行行春遲蘼蕪綠織素那復解琴心乍愜南階悲綠草
誰堪東陌怨黃金紅顏素月俱三五夫婿何在今追虜
關山隴月春雪冰誰見人啼花照戶

殿內一處起金房併勝餘人白玉堂珊瑚挂鏡臨網戶
芙蓉作帳照雕梁房櫳宛轉垂翠幕佳麗逶迤隱珠箔
風前花管颺難留舞處花鈿低不落陽臺通夢太非真
洛浦凌波復不新曲中惟聞張女調定有同姓可憐人

但願私情賜斜領不願傍人相比並妾門逢春自可榮
君面未秋何意冷

泰山言應可轉移新寵不信更參差合歡錦帶鴛鴦鳥
同心綺袖連理枝皎皎新秋明月開早露飛螢暗裏來
鯨燈落花殊未盡虬水銀箭莫相催非是神女期河漢
別有仙姬入吹臺未眠解著同心結欲醉那堪連理杯
後宮不愜茱萸芳夜夜爭開蘇合房寶釵翠鬢還相似
朱唇玉面非一行新人未語言如澀新寵無前判不減

願奉更衣蘭麝氣恐君馬到自驚香

宛轉歌

七夕天河白露明八月濤水秋風驚樓中恒聞哀響曲
塘上復有辛苦行不解何意悲秋氣直置無秋悲自生
不怨前階促織鳴偏愁別路擣衣聲別燕差池自有返
離蟬寂寞詎含情雲聚懷清四望臺月冷相思九重觀
欲題芍藥詩不成來採芙蓉花已散金樽送曲韓娥起
玉柱調弦楚妃歎翠眉結恨不復開寶鬢迎秋度還亂

湘妃拭淚灑貞筠
筵藥浣衣何處人
步步香飛金薄履
盈盈扇掩珊瑚脣
已言采桑期陌上
復能解珮就江濱
競入華堂要花枕
爭開羽帳奉華茵
不惜獨眠前下鈎
欲許便作後來薪
後來暝暝同玉牀
可憐顏色無比方
誰能巧笑特窺井
乍取新聲學繞梁
宿處留嬌墜黃珥
鏡前含笑弄明璫
養菴摘心心不盡
茱萸折葉葉更芳
已聞能歌洞簫賦
詎是故愛邯鄲倡

長相思二首

長相思久別離征夫去遠芳音滅湘水深隴頭咽紅羅
斗帳裏綠綺清絃絕逶迤百尺樓愁思三秋結

長相思久別離春風送燕入簷窺時開脂粉弄花枝紅
樓千愁色玉筋兩行垂心心不相照望望何由知

侍宴玄武觀

詰曉三春暮新雨百花朝星宮移渡罕天駟動行鑣旆
轉蒼龍闕塵飛飲馬橋翠觀迎斜照丹樓望落潮鳥聲
雲裏出樹影浪中搖歌吟奉天詠未必待聞韶

秋日遊昆明池

靈沼蕭條望遊人意緒多
終南雲影落渭北雨聲過
蟬噪金堤柳鷺飲石鯨波
珠來照似月織處寫成河
此時臨水歎非復採蓮歌

秋日登廣州城南樓

秋城韻晚笛危榭引清風
遠氣疑埋劍驚禽似避弓
海樹一邊出山雲四面通
野火初烟細新月半輪空
塞外離羣客顏鬢早如蓬
徒懷建鄴水復想洛陽宮
不及孤

飛雁獨在上林中

贈洗馬袁朗別

賈誼登朝日終軍對奏年
校文升廣內撫劍入崇賢
奇才殊艷逸將別更留連
驅車命鏡管拱坐面林泉
池寒稍下雁木落久無蟬
露浸山扉月霜開石路烟
高談無與慰遲爾報華篇

詒孔中丞負

我行五嶺表辭鄉二十年
間鶯欲動詠披霧即依然
疇

昔同寮案今隨年代改借問藏書處惟君故人在故人
名宦高霜簡肅權豪誰知懷九歎徒然泣二毛步出東
郊望心遊江海上遇物便古今何為不惆悵初晴原野
開宿雨潤條枚叢花曙後發一鳥霧中來淹留蘭蕙苑
吟嘯芳菲晚忘懷靜躁間自覺風塵遠白社聊可依青
山乍採薇鍾牙乃得性語默豈同歸

遇長安使寄裴尚書

傳聞合浦葉遠向洛陽飛北風尚嘶馬南冠獨不歸去

雲目徒送離琴手自揮秋蓬失處所
春草屢芳非太息
關山月風塵客子衣

庚寅年二月十二日遊虎丘山精舍

縱棹憐迴曲尋山靜見聞
每從芳杜性須與俗人分
貝塔涵流動花臺徧嶺芬
蒙龍出檐桂散漫遶窗雲
情幽豈徇物志遠易驚羣
何由狎魚鳥不願屈玄纁

入龍丘巖精舍

法堂猶集雁仙竹幾成龍
聊承丹桂馥遠視白雲峰
風

窗穿石竇月牖拂霜松暗谷留征鳥空林徹夜鐘陰崖
未辨色疊樹豈知重溘此哀時命吁嗟世不容無由訪
詹尹何去復何從

明慶寺

十五詩書日六十軒冕年名山極歷覽勝地殊留連幽
崖聳絕壁洞穴瀉飛泉金河知證果石室乃安禪夜梵
聞三界朝香徹九天山階步皎月澗戶聽涼蟬市朝霑
草露淮海作桑田何言望鐘嶺更復切秦川

入攝山棲霞寺并序

壬寅年十月十八日入攝山棲霞寺登嵯極峭頗
暢懷抱至德元年癸卯十月二十六日又再遊此
寺布法師施菩薩戒甲辰年十月二十五日奉送
金像還山限以時務不得恣情淹留乙巳年十一
月十六日更獲拜禮仍停山中宿永夜留連棲神
悚聽但交臂不停薪指俄謝率製此篇以記即目
俾後來賞者知余山志

淨心抱冰雪暮齒逼桑榆太息波川迅悲哉人世拘歲
華皆採穫冬晚共嚴枯濯流濟八水開襟入四衢茲山
靈妙合當與天地俱石瀨乍深淺崖烟遞有無缺碑橫
古隧盤木卧荒塗行行備履歷步步轉威紆高僧迹共
遠勝地心相符樵隱各有得丹青獨不渝遺風佇芳桂
比德喻生芻寄言長往客悽然傷鄙夫

南越木槿歌

啼妝梁冀婦紅妝蕩子家若持花竝笑宜笑不宜花趙

女垂金珥燕姬挿寶珰誰知紅槿艷無因寄狹邪徒令
萬里道攀折自咨嗟

賦得一日成三賦應令

副君睿賞道清夜北園遊下筆成三賦傳觴對九秋飛
文綺縠采落紙波濤流樹密寒蟬響簷暗雀聲愁綠澈
明層殿青山照近樓此時盛禮物顧省良若抽

卞山楚廟

蘋藻祈明德倚棹息巖阿忽聽晨雞曙非復楚宮歌閒

階蘿宿薺古木斷懸蘿帷堂寂易晚桴鼓自相和盛祀
流百世英威定幾何

山庭春日

洗沐惟五日棲遲在一丘古植橫近澗危石聳前洲
綠開河柳池紅照海榴野花寧待晦山蟲詎識秋人生
復能幾夜燭非長遊

七夕

漢曲天榆冷河邊月桂秋婉孌期今夕飄飄渡淺流
輪

隨列宿動路逐彩雲浮橫波翻瀉淚束素反緘愁此時
機杼息獨向紅妝羞

在陳旦解醒共哭顧舍人

獨酌一樽酒高詠七哀詩何言萬里別非復竹林期階
荒鄭公草戶閒董生帷人隨暮槿落客共晚鶯悲年髮
兩如此傷心詎幾時

和衡陽殿下高樓看妓

起樓侵碧漢初日照紅妝弦心艷卓女曲誤動周郎並

歌時轉黛息舞暫分香挂纓銀燭下莫笑玉釵長

并州羊腸坂

三春別帝鄉五月度羊腸本畏車輪折翻嗟馬骨傷
驚風起朔雁落照盡胡桑關山定何許徒御慘悲涼

夏日還山庭

獨於幽棲地山庭暗女蘿澗漬長低篠池開半卷荷
野花朝暝落盤根歲月多停樽無賞慰狎鳥自經過

賦得三五明月滿

三五兔輝成浮陰冷復輕隻輪非戰反團扇少歌聲雲
前來往色水上動搖明況復高樓照何嗟攬不盈

於長安歸還揚州九月九日行薇山亭賦二韻
心逐南雲逝形隨北雁來故鄉籬下菊今日幾花開

閨怨篇

寂寂青樓大道邊紛紛白雪綺窗前池上鴛鴦不獨自
帳中蘇合還空然屏風有意障明月燈火無情照獨眠
遼西水凍春應少薊北鴻來路幾千願君關山及早度

念妾桃李片時妍

內殿賦新詩

兔影脈脈照金鋪
虬水滴滴瀉玉壺
綺翼雕甍過清漢
虹梁紫柱麗黃圖
風高暗綠凋殘柳
雨駛芳紅濕晚芙
三五二八佳年少
百萬千金買歌笑
偏著故人織素詩
願奏秦聲采蓮調
織女今夕渡銀河
常見新秋停玉梭

姬人怨

天寒海水慣相知
空牀明月不相宜
庭中芳桂樵悴葉

金少卿八十二
卷十
井上疎桐零落枝寒燈作花羞夜短霜雁多情恒結伴
非為隴水望秦川直置思君腸自斷

姬人怨服散篇

薄命夫壻好神仙逆愁高飛向紫烟金丹欲成猶百鍊
玉酒新熟幾千年妾家邯鄲好輕薄特忿仙童一丸藥
自悲行處綠苔生何悟啼多紅粉落莫輕小婦狎春風
羅襪也得步河宮雲車欲駕應相待羽衣未去幸須同
不學簫史還樓上會逐姮娥戲月中

顧野王

字希馮吳郡吳人

羅敷行

東隅麗春日南陌採桑時樓中結梳罷提筐候早期風
輕鶯韻緩露重落花遲五馬光長陌千騎絡青絲使君
徒遣信賤妾畏蠶饑

有所思

賤妾有所思良人久征戍笳鳴塞城表花開落芳樹白
登澄月色黃龍起烟霧還聞雉子斑非復長征賦

艷歌行三首

夕臺行雨度朝梁
照日輝東城採桑返南市
數錢歸長歌挑碧玉
羅塵笑洛妃欲知歡未盡
棲鳥已夜飛

齊倡趙女盡妖妍
珠簾玉砌併神仙
莫笑人來最落後
能使君恩得度前
豈知洛渚羅塵步
詎減天河秋夕渡
妖姿巧笑能傾城
那思他人不憎妬
蓮花藻井推芰荷
採菱妙曲勝陽阿

燕姬妍趙女麗
出入王宮公主第
倚鳴瑟歌未央
調絃

八九弄度曲兩三章惟欣春日永詎愁秋夜長歌未央
倚鳴瑟輕風飄落蘂乳燕巢蘭室結羅帷翫朝日窗開
翠幔卷妝罷金星出爭攀四照花競戲三條術

岑之敬

字思禮
南陽人

折楊柳

將軍始見知細柳遶營垂懸絲拂城轉飛絮上宮吹塞
門交度葉谷口暗橫枝曲成攀折處惟言怨別離

對酒

色映臨池竹香浮滿砌蘭舒文泛玉盃漾蟻溢金盤簫
曲隨鸞易笳聲出塞難惟有將軍酒川上可除寒

烏棲曲

驄馬直去沒浮雲河渡冰開兩岍分鳥藏日暗行人息
空棲隻影長相憶明月二八照花新當壚十五晚留賓

徐伯陽

字隱忍
東海人

日出東南隅行

朱城壁日啓朱扉青樓含照本暉暉遠映陌上春桑葉

斜入秦家綳綺衣羅敷妝粉能佳麗鏡前新梳倭墜髻
圓籠裊裊挂青絲纖鈎冉冉勝丹桂蠶饑日晚慙生愁
忽逢使君南陌頭五馬停珂遣借問雙臉含嬌特好羞
妾壻府中輕小吏即今來往專城裏欲識東方千騎歸
藹藹日暮紅塵起

阮卓

陳留尉
氏人

詠魯仲連

魯連有高趣意氣本相求笑罷秦軍却書成燕將愁聊

棄南金賞方從滄海遊寄言人世客非君能見留

賦得風

高風應爽節搖落漸疎林吹雲旅雁斷臨谷曉松吟屢
惜涼秋扇常飄清夜琴泠泠隨列子彌諧逸豫心

賦得黃鵠一遠別

霜風秋月映樓明寡鵠偏棲中夜驚月下裴徊顧別影
風前悽斷送離聲離聲一去斷還續別響時來疎復促
聊看遠客贈綾紋彌怨閒宵雅琴曲恒思昔日稻梁恩

理翩整翰上君軒獨舞輕飛向吳市孤鳴清唳出雷門
王子吹笙忽相值自覺飄飄雲裏駛一舉千里未能歸
惟有田鏡解深意

陳昭

義興國山人

昭君詞

跨鞍今永訣垂淚別親賓漢地隨行盡胡關逐望新
交河擁斷霧隴日暗沙塵惟有孤明月猶能遠照人

聘齊經孟嘗君墓

薛城觀舊跡征馬屢徘徊盛德今何在惟餘長夜臺蒼
茫空龍路顚顚古松栽悲隨白楊起淚想雍門來泉戶
無關吏雞鳴誰為開

祖孫登

仕陳為
記宅

紫駟馬

候馬指樓蘭長城迴路難嘶從風處斷骨住水中寒飛
塵暗金勒落淚灑銀鞍抽鞭上關路誰念客衣單

詠風

颯颯楚王宮
裴徊遶竹叢
帶葉俱吟樹
將花共儻空
飄香雙袖裏
亂曲五絃中
試上高臺聽
悲響定無窮

詠水

驪泉紫闕映
珠浦碧沙沈
岼澗蓮香遠
流清雲影深
風潭如拂鏡
山溜似調琴
請君看皎潔
知有澹然心

詠柳

馳道藏烏日
鬱鬱正翻風
抽翠爭連影
飛綿亂上空
高葉臨胡塞
長枝拂漢宮
欲驗傷攀折
三春橫笛中

劉剛

仕陳為
長吏

泛宮亭湖

迴艫乘派水舉帆逐分風
滉漾疑無際飄颻似度空
檣烏排鳥路船影沒河宮
孤石滄波裏匡山苦霧中
寄謝千金子安知萬里蓬

賦得蘇武

奉使窮沙漠收淚上河梁
食雪天山近思歸海路長
繫書秋待雁握節暮看羊
因思李都尉還漢不相忘

侯司空宅詠妓

石家金谷妓妝罷出蘭閨看花只欲笑聞瑟不勝啼山
邊歌落日池上舞前溪將人當桃李何處不成蹊

賦松上輕蘿

葉遶千年蓋條依百尺枝屬與松風動時將薜影垂學
帶非難結為衣或易披山阿若近遠獨有楚人知

謝燮

隴頭水

隴阪望咸陽
征人慘思腸
咽流喧斷岼
遊沫聚飛梁
鳬分斂冰彩
虹飲照旗光
試聽饒歌曲
惟吟君馬黃

蕭詮

仕陳為黃門郎

巫山高

巫山映巫峽
高高殊未窮
猿聲不辨處
雨色詎分空
懸厓下桂月
深澗響松風
別有仙雲起
時向楚王宮

賦得徃徃孤山映

青山照落暉
映遠望連飛
仙峰看玉笥
關路視金微
鼓

吹聲凝盡香爐烟覺稀共君臨水別勞此送將歸

賦得夜猿啼

桂月影才通猿啼迴入風隔巖還嘯侶臨潭自響空挂
藤疑欲飲吟枝似避弓別有三聲淚霑裳竟不窮

賦得婀娜當軒織

東南初日照秦樓西北織婦正嬌羞綺窗猶垂翡翠幌
珠簾半上珊瑚鉤新妝入機映春牖弄杼鳴梭挑織手
何曾織素讓新人不掩流蘇推中婦三日五匹未言遲

衫長腕弱繞輕絲綾中轉躡成離鵠錦上迴文作別詩
不惜繞素同霜雪更傷秋扇篋中辭

賀徹

仕陳為
左戶郎

採桑

蠶妾出房櫳結伴類花叢度水春衫綠映日晚妝紅釧
聲時動樹衣香自入風鉤長嫩枝曲葉盡細條空競採
須盈手爭歸欲滿籠自憐公府步誰與少年同

賦得長笛吐清氣

胡關氛霧侵羌笛吐清音韻切山陽曲聲悲隴上吟柳
折城邊樹梅舒嶺外林方知出塞虜不憚武溪深

賦得庭中有奇樹

三春節物始芳菲遊絲細草動春暉香風飄舞花間度
好鳥和鳴枝上飛臨池間竹偏增綠依階映雪紛如玉
溫室庭前竟不言鼓吹樓中能作曲曾聞遠別舊難思
攀折令取贈佳期長條本自堪為帶密葉由來好作帷
星稀漢轉月輪明徘徊夜鵲屢相驚欲識幽人蘭杜逕

山窗芳桂復叢生

何胥

後主時為
太常令

被使出關

出關登隴坂迴首望秦川
絳水通西晉機橋指北燕
奔流下激石古木上參天
鶯啼落春後雁度在秋前
平生屢此別腸斷自催年

哭陳昭

思人適舊館寂寞非一源
無復酣歌樂空餘燕雀喧
落

暉隱窮巷秋風生故園撫孤空對此零淚欲奚言

徐德言

破鏡詩

鏡與人俱去鏡歸人未歸無復姮娥影空留明月輝

樂昌公主

餞別自解

今日何遷次新官對舊官笑啼俱不敢方信作人難

張君祖

詠懷三首

運形不標異澄懷恬無欲座可依王侯門宜迴金轂風
來詠逾清鱗萃淵不濁斯乃玄中子所以矯逸足何必
翫幽閒青衿表離俗百齡苟未遐昨辰亦非促曦騰望
舒映曩今迭相燭一世皆逆旅安悼雷往速區區雖非
黨兼忘混礫玉恪神罔叢穢要在夷心曲

靈飈起回浪飛雲騰逆鱗苟擢南陽秀固集三造賓緬
懷結寂夜味藻詠終晨延佇時無邁誰與拂流塵眇情

寄極眇蕭條獨遨神相忘東溟裏何晞西朝津我崇道
無廢長謠想義人

遙遊播荆衡策杖憩南郢遭動透浪迹過靜恬夷性拊
卷從老語揮綸與莊詠遐眺獨緬想蕭神颺塵正時無
喜惠偶絕韻將誰聽習子茂芳標有欣徽音令穎敷陵
霜倩葩熙三春盛拂翮期霄翔豈與桑榆競我混不材
姿遺情忘雕映雖非嶧陽椅聊以翮泗磬

庾僧淵

代答張君祖

省贈法顧詩經通妙遠亶亶清綺雖云言不盡意
殆亦幾矣夫詩者志之所之意迹之所寄也忘妙
玄解神無不暢夫未能冥達玄通者惡得不有仰
鑽之詠哉吾想茂得之形容雖棲守殊塗標寄玄
同仰代答之未足盡美亦各言其志也其辭曰

真朴運既判萬象森已形精靈感冥會變化靡不經波
浪生死徒彌綸始無名捨本而逐末悔吝生有情胡不

絕可欲反宗歸無生達觀均有無蟬蛻豁朗明逍遙衆
妙津栖凝于玄冥大慈順變通化育曷常停幽閒自有
所豈與菩薩并摩詰風微指權適多所成悠悠滿天下
孰識秋露情

陽縉

賦得荆軻

函關使不通燕將重深功長虹貫白日易水急寒風壯
髮危冠下七首地圖中琴聲不可識遺恨沒秦宮

照帙秋螢

秋窗餘照盡入暗早螢來忽聚遠同色恒然詎落灰飛
影黃金散依帷縹帙開含明終不息夜月空裴徊

俠客控絕影

青門小苑物華新花開鳥弄會芳春仙掌層臺浮麗日
長楸廣路起紅塵園中追尋桃李逕陌上逢迎遊俠人
游俠英名馳上國人馬意氣俱相得白玉鹿盧秋水劍
青絲宛轉黃金勒復有魚目並龍文躡影追風本絕羣

影入吳門疑曳練形來西北似浮雲寄語幽并馳射客
未肯推名持借君

陽慎

從駕祀麓山廟

聖德憂民暇麾旆謁山靈畫船汎北渚文馬侍東平春
浦戈鋌照寒林鐃吹鳴依稀長安驛蕭條都尉城井泉
能共動江帆得分行窗幽細網合階靜落花明欄巢始
入燕軒樹已遷鶯菲菲蘭俎馥淡淡桂樽清銀塘日影

盡玉座舞衣輕

伏知道

從軍五更轉五首

一更刁斗鳴校尉連連城遙聞射鵬騎懸憚將軍名
二更愁未央高城寒夜長試將弓學月聊將劍比霜
三更夜警新橫吹獨吟春彊聽梅花落誤憶柳園人
四更星漢低落月與雲齊依稀北風裏胡笳雜馬嘶
五更催送籌曉色映山頭城烏初起堞更人悄下樓

何楫

班婕妤怨

齊紈既逐簾趙舞即凌人履跡隨恩故階苔逐恨新獨
卧銷香炷長啼費錦中庭草何聊賴也持秋當春

徐湛

賦得班去趙姬升

班姬與飛燕俱侍漢王宮不意思情歇偏將衰草同香
飛金輦外苔上玉階中今日悲團扇非是為秋風

蕭琳

隔壁聽妓

徒聞絃管切不見舞腰迴惟有歌梁共塵飛一半來

釋惠標

詠山三首

靈山蘊麗名秀出寫蓬瀛香爐帶烟上紫蓋入霞生霧捲蓮峰出崑開石鏡明定知丘壑裏併佇白雲情

蛾眉信重險天目本仙居金華抱丹竈玉笥蘊神書幽

人披荔薜怨妾採薜蘿紫晶無暮雨何時送故夫
丹霞拂層閣碧水泛蓬萊鰲岫含烟聳蓮崖照日開松
門夾細葉石磴染新苔能令平子見淹留未肯回

曇瑗

金陵人

遊故苑

丹陽松葉少白水黍苗多浸淫下客淚哀怨動民歌春
溪度短葛秋浦沒長莎麋鹿自騰倚車騎絕經過蕭條
四野望惆悵將如何

釋洪偃

會稽山陰人


登吳昇平亭

蕭蕭物候晚蕭蕭天望清旅人聊策杖登高蕩客情川
原多舊迹墟里或新名宿烟浮始旦朝日照初晴獨遊
乏徒侶徐步寡逢迎信矣非吾託賞心何易并

遊鍾山之開善定林息心宴坐引筆賦詩

策杖步前嶺褰裳出外扉輕蘿轉蒙密幽逕復紆威樹
高枝影細山盡鳥聲稀石苔時滑屣蟲網乍粘衣澗傍

紫芝曄崑上白雲霏松子排烟去堂生寂不歸窮谷無
還往攀桂獨依依



石倉歷代詩選卷十